
ACHT NA DTEANGACHA OIFIGIÚLA 2003

OFFICIAL LANGUAGES ACT 2003

SCÉIM 2005-2008

SCHEME 2005-2008

CLÁR ÁBHAR

- 1. Réamhrá agus Cúlra**
- 2. Oifig an Stiúrthóra Ionchúiseamh Poiblí**
- 3. Suirbhéireacht ar an Oifig agus an méid a bhfuil seirbhísí le fáil trí Ghaeilge faoi láthair**
- 4. Feabhas ar na seirbhísí a chuirfear ar fáil go dátheangach**
- 5. Monatóireacht**
- 6. An scéim chomhaontaithe a phoibliú**

1. RÉAMHRÁ & CÚLRA

D'ullmhaigh Oifig an Stiúirthóra Ionchúiseamh Poiblí an scéim seo faoi *Alt 11* d'Acht na dTeangacha Oifigiúla 2003 ("an tAcht"). Déantar socrú le *hAlt 11* go n-ullmhóidh comhlachtaí poiblí scéim reachtúil ina sonrú na seirbhísí a sholáthróidh said:

- trí mheán na Gaeilge amháin
- trí mheán an Bhéarla amháin
- trí mheán na Gaeilge agus an Bhéarla araon
- agus na bearta a bheartaíonn an comhlacht a ghlacadh chun a chinntiú go ndéanfar aon seirbhísí nach soláthraíonn an comhlacht trí mheán na Gaeilge a sholáthar amhlaidh laistigh de thréimhse ama chomhaontaithe.

1.1 Treoirínte i ndáil le hullmhú Scéime

Déantar socrú le *hAlt 12* den Acht go ndéanfaidh an tAire Gnóthaí Pobail, Tuaithe agus Gaeltachta treoirínte a ullmhú agus iad a eisiúint chuig comhlachtaí poiblí chun cabhrú leo le linn dóibh a ndrúacht-scéimeanna a ullmhú. Cuireadh an scéim seo le chéile i dteannta le hobair chothreomhar maidir leis na treoirínte a rinne Grúpa Oibre Idir-Rannach ina raibh comhaltaí ón Oifig seo agus ó Ranna Rialtais eile páirteach.

D'fhoilsigh an Oifig fógra faoi *Alt 13* i Samhain 2004, ag lorg uirill i ndáil le drúacht-scéim faoi *Alt 11* a ullmhú ó pháirtithe a raibh suim acu déanamh amhlaidh. Tá na huirill go léir a cuireadh faoi bhráid na hOifige le fáil ar láithreán gréasáin na hOifige www.dppireland.ie. Cuireadh na tuairimí agus na moltaí a tháinig as na huirill agus ón bhfoireann sna hAonaid éagsúla san áireamh sa scéim. Tá an Oifig an-bhuíoch as am agus as iarrachtaí na ndaoine go léir a bhí páirteach sa phróiseas seo.

1.2 Ábhar na Scéime Teanga

Rinne Fo-Ghrúpa Comhpháirtíochta, a bhí ionadaíoch ar bhonn leathan do na rannáin agus na haonaid éagsúla den Oifig, an obair ullmhúcháin maidir le drúachtú na scéime. Is ar an mbainistíocht shinsearach laistigh den Oifig seo atá an fhreagracht monatóireacht a dhéanamh ar an scéim agus í a athbhreithniú. Cuireann an scéim leis an méid atá seirbhísí á gcur ar fáil trí mheán na Gaeilge faoi láthair. Aithnítear sa scéim na bealaí ar féidir an tseirbhís atá á cur ar fáil ag an oifig a fheabhsú sa todhcháil.

Ar áireamh sa scéim freisin tá gealltanais an t-éileamh ar sheirbhísí trí mheán na Gaeilge a mheas ar bhonn leanúnach agus a chinntiú go leanfaidh an Oifig den éileamh seo a shásamh i slí atá pleanáilte, cruinn agus so-aimsithe. Coinneoidh an Oifig súil ar líon na gcásanna ina mbeidh an Stiúirthóir

Ionchúiseamh Poiblí páirteach agus ina lorgóidh duine den phobal a imeachtaí nó a himeachtaí a sheoladh trí mheán na Gaeilge. Thairis sin, leanfaidh an Oifig den líon fiosrúchán agus iarratas maidir le seirbhísí trí mheán na Gaeilge a mheas ar bhonn bliantúil.

1.3 Dáta tosaigh na Scéime

Chomhaontaigh Oifig an Stiúrthóra Ionchúiseamh Poiblí an scéim seo. Beidh éifeacht leis an scéim ón 1 Iúil 2005 agus fanfaidh sí i bhfeidhm ar feadh tréimhse 3 bliana ón dáta seo nó go dtí go mbeidh scéim nua daingnithe ag an Stiúrthóir de bhun Alt 15 den Acht, cibé acu is luaithe.

2. OIFIG AN STIÚRTHÓRA IONCHÚISEAMH POIBLÍ

2.1 Ginearálta

Bunaíodh Oifig an Stiúrthóra Ionchúiseamh Poiblí leis an Acht um Ionchúiseamh i gCionta, 1974. Tugtar an DPP ar an Stiúrthóir Ionchúiseamh Poiblí. Mar a leagtar amach sa Ráiteas Straitéise 2001 – 2003, tá sé mar mhisean ag an Stiúrthóir Ionchúiseamh Poiblí agus ag an Oifig ‘seirbhís ionchúisimh atá neamhspleách, cóir agus éifeachtach a chur ar fáil do Phobal na hÉireann’.

Tá trí Rannán in Oifig an Stiúrthóra Ionchúiseamh Poiblí:

- **An Rannán Treorúcháin:** Tá abhcóidí agus aturnaetha anseo a scrúdaíonn comhaid imscrúdaithe coiriúla agus a dhéanann cinneadh maidir le cibé acu ar chóir nó nár chóir ionchúiseamh a thabhairt. Tá an Rannán Treorúcháin lonnaithe i 14-16 Sráid Mhuirfean, Baile Átha Cliath 2.
- **Rannán na nAturnaetha:** Tá aturnaetha agus feidhmeannaigh dhlíthiúla anseo a ullmhaíonn agus a sheolann cásanna thar ceann an Stiúrthóra Ionchúiseamh Poiblí sna Cúirteanna go léir a bhíonn ag suí i mBaile Átha Cliath. Tá Rannán na nAturnaetha lonnaithe i Chapter House, 26-30 Sráid na Mainistreach Uachtarach, Baile Átha Cliath 1.
- **An Rannán Riaracháin:** Cuireann an rannán seo tacaíocht agus seirbhísí eile ar fáil don Rannán Treorúcháin agus do Rannán na nAturnaetha. Tá an Rannán Riaracháin lonnaithe sa dá fhoirgneamh de chuid Oifig an Stiúrthóra Ionchúiseamh Poiblí.

2.2 Ról agus Feidhm Oifig an Stiúrthóra Ionchúiseamh Poiblí


Cuireann an Stiúrthóir an dlí choiriúil i bhfeidhm go neamhspleách sna cúirteanna thar ceann phobal na hÉireann; stiúran agus maíonn sé nó sí ionchúisimh phoiblí ar díotáil sna cúirteanna; agus tugann sé nó sí treoir ghinearálta agus comhairle don Gharda Síochána i ndáil le cásanna achoimre sna cúirteanna agus treoir shonrach i gcásanna ina n-iarrtar sin.

Is faoin Stiúrthóir atá sé cinneadh a dhéanamh ar chóir daoine a chúiseamh i gCionta coiriúla agus cad iad na cúisimh ba chóir a thabhairt. Nuair a dhéantar na cúisimh a thabhairt bíonn Oifig an Stiúrthóra Ionchúiseamh Poiblí i bhfeighil an cháis ionchúisimh.

Déanann an Stiúrthóir na cásanna is tromchúisí a ionchúiseamh i gcónaí agus déanann an Stiúrthóir cásanna nach mbíonn chomh tromchúiseach a ionchúiseamh ar uairibh. Is os comhair giúiré a dhéantar cásanna tromchúiseacha a éisteacht sa Chúirt Choiriúil Chuarda nó sa Phríomh-Chúirt Choiriúil nó sa Chúirt Choiriúil Speisialta.

Gníomhaíonn an Príomh-Aturnae Ionchúisimh mar aturnae don Stiúrthóir Ionchúiseamh Poiblí agus mar cheannasaí ar Rannán na nAturnaetha in Oifig an Stiúrthóra Ionchúiseamh Poiblí. Tá foireann Rannán na nAturnaetha ionadaíoch don Stiúrthóir sna cúirteanna go léir i mBaile Átha Cliath. Tá Aturnaetha Stáit Áitiúla ionadaíoch don Stiúrthóir sna cúirteanna go léir lasmuigh de Bhaile Átha Cliath.

2.3 ÁR NGEALLSEALBHÓIRÍ



3. SUIRBHÉIREACHT AR AONAIÐ NA HOIFIGE AGUS AN MÉID A BHFUIL SEIRBHÍSÍ AR FÁIL TRÍ GHAELGE FAOI LÁTHAIR

3.1 Ginearálta

Is é príomh-chuspóir an Achta ná a chinntiú go mbeidh fáil níos fearr ar sheirbhísí poiblí trí Ghaeilge agus go mbeidh siad ar chaighdeán níos airde. Tá gealltanais tugtha i bPlean Gníomhaíochta Scotsheirbhíse na hOifige, 2004-2006 go ndéanfaidh an oifig:

"Seirbhísí ar ard-chaighdeán a sholáthar trí Ghaeilge agus/nó go dátheangach agus custaiméirí a chur ar an eolas maidir lena gcearta a roghnú go ndéileálfar leo trí cheachtar ceann de na teangacha oifigiúla'.

Le roinnt blianta anuas tá Tuarascáil Bhliantúil agus Ráiteas Straitéise na hOifige agus roinnt foilseachán eile curtha ar fáil go dátheangach ag an Oifig. Ina theannta sin, is láithreán gréasáin dátheangach é láithreán gréasáin na hOifige. Tá freagraí tugtha ag an Oifig i nGaeilge ar chomhfhreagras a fuarthas i nGaeilge. Tá páipéar litreach na hOifige dátheangach. Is go dátheangach atá na beannachtaí glórphoist ar sheirbhísí fhreagartha na hOifige nuair a bhíonn áitreabh Shráid Mhuirfean dúnta. Déileálann an Oifig le roinnt cásanna trí Ghaeilge i Rannán na nAturnaetha agus sa Rannán Treorúcháin. Tá líon beag d'fhoireann na hOifige atá idir cuibheasach líofa agus an-líofa maidir le hábhar i nGaeilge a thuiscint agus a chruthú agus cuireadh a n-inniúlacht i bhfeidhm sna cásanna luaite. Tá líon beag Abhcóidí a bhfuil aithint orthu mar abhcóidí atá inniúil chun déileáil le cásanna trí Ghaeilge fostaithe ag an Oifig. Cinntíonn an Oifig go ndéantar folúntais a fhógairt go dátheangach. Bunaíodh Fo-Ghrúpa Gaeilge tríd an bpróiseas Comhpháirtíochta, agus tá an grúpa ag tabhairt faoin gcéad scéim faoi Acht na dTeangacha Oifigiúla a dhréachtú agus táthar curtha i mbun cur chun cinn na teanga i gcoitinne i measc foirne na hOifige. Tá clár seasta d'ócáidí sóisialta curtha ar bun chun an cuspóir seo a bhaint amach.

Tá cur síos gairid san alt seo ar fheidhmeanna gach Rannáin, agus leagtar amach ann an méid a dhéantar aon seirbhísí a sholáthar don phobal i gcoitinne, agus sna cásanna ina ndéantar amhlaidh, an méid a dhéantar na seirbhísí a sholáthar trí Ghaeilge más gá.

3.2 An Rannán Treorúcháin

Abhcóidí agus aturnaetha atá sa Rannán Treorúcháin a scrúdaíonn comhaid imscrúdaithe a fhaightear ón nGarda Síochána agus ó ghníomhaireachtaí imscrúdaithe eile. Tar éis an scrúdú seo a dhéanamh tugann siad treoir, trí Rannán na nAturnaetha nó trí Aturnaetha Stáit Áitiúla, maidir le hionchúiseamh a thionscnamh nó leanúint ar aghaidh nó ionchúiseamh a

tharraingt siar go hachomair (sa Chúirt Dúiche) nó ar díotáil (os comhair na gcúirteanna seo a leanas, an Chúirt Chuarda, an Príomh-Chúirt Choiriúil agus an Chúirt Choiriúil Speisialta) agus tugtar treoir ar na cúisimh iomchuí. Tugann siad treoir agus teoracha freisin maidir leis na hiarratais go léir ar athbhreithniú breithiúnach, iarratais habeas corpus, cásanna sonraithe, bannaí agus aon iarratais eile sna huaschúirteanna, inar páirtí an Stiúrthóir. Soláthraíonn an Rannán treoir agus teoracha dlíthiúla leanúnacha do Rannán na nAturnaetha agus do na hAturnaetha Stáit Áitiúla freisin go dtí go mbeidh an cás atá á éisteacht curtha i gcrích. Is ar an Rannán Treorúcháin atá an fhreagracht fhoriomlán as ionchúisimh a thabharfar in ainm an Stiúrthóra Ionchúiseamh Poiblí go dtí go gcuirfear an t-ionchúiseamh i gcrích.

Cuireann an Rannán comhairle leanúnach ar fáil don Gharda Síochána agus do gníomhaireachtaí imscrúdaithe speisialacha eile i ndáil le hionchúisimh choiriúla atá beartaithe.

Tá toirmeasc ar chumarsáid áirithe leis an Stiúrthóir Ionchúiseamh Poiblí maidir le himeachtaí coiriúla leis an Acht um Ionchúiseamh i gCionta 1974, ar mhaithe le dul i gcion ar chinneadh ionchúiseamh a aistharraingt nó, a thosú, ach amhain i gcás cumarsáid ó: íospartach coiriúlachta; duine de theaghlach íospartaigh coiriúlachta; duine cúisithe; duine de theaghlach duine cúisithe; daoine ag scríobh thar ceann a gcliaint (dlíodóirí, dochtúirí agus oibríthe sóisialta).

Déileálann an Rannán Treorúcháin le líon beag cásanna, cumarsáide agus fiosrúcháin trí Ghaeilge. Dhéileáil comhaltaí d'fhoireann an Rannáin Treorúcháin a raibh leibhéil inniúlachta éagsúla acu ó thaobh a gcuid Gaeilge, cuid acu cuibheasach líofa agus sin amháin, leis na cásanna sin agus i gcásanna áirithe trí chúnadh a fháil ó fhoireann dlí lasmuigh den Rannán féin.

3.3 Rannán na nAturnaetha

Cuireann Rannán na nAturnaetha seirbhís aturnae ar fáil don Stiúrthóir Ionchúiseamh Poiblí i gCúirteanna Dúiche Dhúiche Cathrach Bhaile Átha Cliath, i gCúirt Choiriúil Chuarda Bhaile Átha Cliath agus i ndáil le cásanna sa Phríomh-Chúirt Choiriúil agus sa Chúirt Choiriúil Speisialta. Áirítear ar an obair seo Leabhair Fianaise a ullmhú agus obair trialach, lena n-áirítear abhcóideacht, chomh maith le hiarratais chun na hArd-Chúirte agus chun na Cúirte Uachtaraí, de réir mar is cuí. Soláthraíonn an Rannán an tseirbhís seo freisin i ndáil le gach iarratas ar athbhreithniú breithiúnach, iarratais habeas corpus, cásanna sonraithe, iarratais ar bhannaí, etc. sna huaschúirteanna, i gcás gur páirtí an Stiúrthóir. Bíonn cumarsáid idir an fhoireann dhlíthiúil sa Rannán agus an pobal nó a n-ionadaithe nuair a bhíonn freagra á thabhairt ar chumarsáid a dhéanann Cosantóir nó gearánach nó a dhéantar thar ceann an Chosantóra nó an ghearánaigh in imeachtaí coiriúla nó ó dhuine atá páirteach mar chomhairleoir dlí nó leighis do dhuine a bhfuil baint aige nó aici leis an ní.

Tá líon beag den fhoireann dhlíthiúil sa Rannán atá inniúil sa Ghaeilge. Tá duine amháin eile ar an bhfoireann atá cuibheasach inniúil chun déileáil le cásanna trí Ghaeilge. Faoi láthair, níl aon fhoireann dhlíthiúil eile sa Rannán a bhfuil a leibhéal Gaeilge dóthanach chun déileáil go cuí le hionchúisimh/iarratais trí Ghaeilge dá mbeadh gá leis.

Le cúpla bliain anuas bhí líon beag cásanna (níos lú ná deich gcinn) maidir le hathbhreithniú breithiúnach trí Ghaeilge. Is comhaltaí den fhoireann dhlíthiúil a bhí inniúil sa Ghaeilge a phróiseáil iad sin, chomh maith le hAbhcóide atá líofa sa Ghaeilge a fostaíodh.

Tharla sé i líon an-bheag cásanna i gCúirt Choiriúil Chuarda Bhaile Átha Cliath gur iarr an cúisí go ndéanfaí a chás nó a cás a éisteacht trí Ghaeilge. Sna cásanna sin cuireadh mionteagasc ar Abhcóide a bhí líofa sa Ghaeilge.

Ó am go ham, iarrfaidh duine cúisithe go ndéileálfar lena chás nó lena cás trí Ghaeilge sa Chúirt Dúiche. Níl sé d'inniúlacht ag an Oifig faoi láthair cás a ionchúiseamh sa Chúirt Dúiche trí Ghaeilge gan abhcóide a thabhairt isteach ó áit eile.

Níl aon taifead ann ar aon éilimh eile ar sheirbhísí trí Ghaeilge le tamall anuas.

3.4 An Rannán Riaracháin

Is gnáthghráid seirbhíse den Státseirbhís den chuid is mó atá sa Rannán Riaracháin chomh maith le foireann Leabharlainne a sholáthraíonn na seirbhísí eagraíochta, bonneagair, riaracháin agus faisnéise a theastaíonn ón Oifig. Soláthraíonn an Rannán seirbhísí tacaíochta freisin don Rannán Treorúcháin agus do Rannán na nAturnaetha. Is é an Béarla gnáth-theanga oibre an Rannáin Riaracháin. Ní bhíonn aon idirchaidreamh idir formhór fhoireann an Rannáin agus an pobal. Nuair a tharlaíonn sé is maidir leis na nithe seo a leanas a tharlaíonn: earcaíocht, iarratais saorála faisnéise, gearáin agus iarratais ar fhaisnéis ghinearálta maidir le feidhmeanna na hOifige nó faisnéis shonrach maidir le comhaid ionchúisimh. Níl sé d'inniúlacht ag an Rannán faoi láthair freagra a thabhairt trí Ghaeilge ar theagmháil ó bhéal trí Ghaeilge. Déantar, áfach, freagra trí Ghaeilge a thabhairt ar gach cumarsáid scríofa a fhaightear trí Ghaeilge. Bíonn gá le seirbhísí príobháideacha aistriúcháin a úsáid chun an tseirbhís seo a chur ar fáil.

Déantar na cómórtais earcaíochta go léir a eagraíonn an Oifig a fhógairt i nuachtáin Ghaeilge. Cuireann an Oifig in iúl go gcuirtear fáilte roimh iarratais i nGaeilge nó i mBéarla. Níl aon taifead ann gur bhain iarratasóir ar bith leas as an tsaoráid chun iarratas a chur faoi bhráid na hOifige i nGaeilge.

Láithreán atá dátheangach go hiomlán é láithreán gréasáin na hOifige a ndéanann an Rannán Riaracháin cothabháil air agus is beartas de chuid na hOifige é leaganacha dátheangacha nó leaganacha ar leithligh i nGaeilge agus i mBéarla de thuarascálacha ón Oifig a chur ar fáil. Tá beannachtaí dátheangacha curtha ar sheirbhís ghutháin na hOifige.

4. FEABHAS AR NA SEIRBHÍSÍ A CHUIRFEAR AR FÁIL GO DÁT HEANGACH NÓ TRÍ GHAELIGE

4.1 Gealltanais Ginearálta Oifig an Stiúirthóra Ionchúiseamh Poiblí

Tá sé mar ghealltanais ag an Oifig leibhéal na seirbhíse áta á soláthar faoi láthair trí Ghaeilge a chothabháil ach freisin an leibhéal seirbhíse a sholáthraítear don phobal i gcoitinne go dátheangach agus trí mhéan na Gaeilge a fheabhsú.

Maidir leis na gealltanais a bhaineann le caighdeáin seirbhíse a ghlac Oifig an Stiúirthóra Ionchúiseamh Poiblí i ndáil le seachadadh seirbhísí, beidh said i bhfeidhm maidir leis na seirbhísí sin, cibé acu trí mhéan na Gaeilge nó an Bhéarla a thabharfar iad.

Tá sé mar ghealltanais ag an Oifig freagra a thabhairt trí Ghaeilge ar an gcomhfhreagras go léir a fhaightear i nGaeilge, agus a mhéid is féidir é cúrsaí a éascú do dhaoine ar mian leo go ndéileálfaí lena n-imeachtaí sa chúirt trí Ghaeilge. Déanfaidh an Oifig an leibhéal éilimh ar sheirbhísí trí Ghaeilge ón bpobal a thomhas ar bhonn leanúnach agus rachaidh sí i mbun gnímh chun féachaint lena chinntiú go mbeidh acmhainní leordhóthanacha ar fáil chun an t-éileamh sin a shásamh. Éascóidh an Oifig, tríd an bpróiseas Comhpháirtíochta, cothabháil fho-ghrúpa Gaeilge a mbeidh daoine saorálacha ón bhfoireann mar chomhaltaí de. Beidh ról ag an bhfo-ghrúpa sin i gcomhordú chur chun cinn na teanga san áit oibre go ginearálta, trí ghníomhaíochtaí sóisialta agus eile. Déanfar an obair seo in éineacht leis an Oifigeach Gaeilge.

4.2 An tOifigeach Gaeilge

Tá cinneadh déanta ag an Oifig fócas ar fheabhsú leibhéal na seirbhíse a sholáthraítear trí Ghaeilge a sholáthar trí phost Oifigeach Gaeilge a bhunú. Beidh ról lárnach idirchaidrimh ag an oifigeach agus gníomhóidh sé nó sí mar phointe tagartha maidir le hobair go léir na hOifige a bhaineann leis an nGaeilge.

Cuirfidh an tOifigeach Gaeilge tacaíocht agus cúnaimh ar fáil i ndáil le gnáthchomhfhreagras a aistriú agus gnéithe áirithe de dhoiciméadacht dhlíthiúil a thagann chun cinn san Oifig ó am go ham. Tabharfaidh an tOifigeach Gaeilge comhairle freisin nuair a bheidh gá le hábhar Gaeilge a chur amach lena aistriú go gairmiúil.

Tiocfaidh an tOifigeach Gaeilge le chéile le Ceannasaithe na Rannán san Oifig maidir le riachtanais oiliúna don fhoireann a aithneofar ó am go ham.

Comhordóidh an tOifigeach Gaeilge soláthar faisnéise agus acmhainní a bhaineann le Gaeilge trí dheilbhín ar bhunachar sonraí Theicneolaíocht

Faisnéise na hOifige, in éineacht leis an Aonad Teicneolaíochta Faisnéise, agus trí sheirbhís leabharlainne na hOifige, agus trí theagmháil phearsanta.

Cuirfidh an tOifigeach Gaeilge cúnaimh agus pointe tagartha ar fáil don fhoireann go léir a ghlacann glaonna gutháin nó a bheidh ag déileáil le comhfhreagras scríofa eile nó le comhfhreagras leictreonach trí Ghaeilge.

Tabharfaidh an tOifigeach Gaeilge tuarascáil (An Tuarascáil Gaeilge) don Bhainistíocht gach sé mhí ina n-aithneofar na bearta a bheidh glactha chun gealltanais na hOifige faoin Scéim 2005-2008 a chomhlíonadh, agus ina ndéanfar moltaí i ndáil le tuilleadh oiliúna agus riachtanais acmhainne.

Tá sé mar ghealltanais ag an mBainistíocht, a mhéid is indéanta agus laistigh de thréimhse ama réasúnach, na riachtanais maidir le hoiliúint agus acmhainní a aithneoidh an tOifigeach Gaeilge sa tuarascáil gach sé mhí a shásamh.

Déanfar an chéad tuarascáil (Tuarascáil Gaeilge) i Nollaig 2005, agus gach sé mhí dá éis sin. Déanfaidh an bhainistíocht cibé réiteach is cuí maidir leis an méid oibre a eascróidh i gcomhthéacs na hoibre a thabharfar don Oifigeach a bheidh i seilbh an phoist seo. Tá sé mar ghealltanais ag an Oifig freisin a éascú don Oifigeach Gaeilge cibé oiliúint agus cothabháil scileanna teanga is gá a fháil.

4.3 Gníomhartha sonracha eile chun tacú le feabhsú na seirbhísí

Spreagfaidh an Oifig an fhoireann chun freastal ar chúrsaí oiliúna Gaeilge i rith laethanta oibre chun a scileanna teanga a fheabhsú.

Cuirfear oiliúint ar fáil d'oibríteoirí lasc-chláir agus d'fháilteoirí chun a chinntiú go ndéileálfar le cumarsáid trí Ghaeilge ar shlí a bheidh pras agus sásúil.

Bunóidh Aonad Teicneolaíochta Faisnéise na hOifige seoladh ríomhphoist le haghaidh fiosrúcháin trí Ghaeilge. Cinnteoidh an Oifig go ndéileálfar leis na fiosrúcháin sin i slí a bheidh chomh cuimsitheach céanna agus a dhéantar le fiosrúcháin trí Bhéarla.

Bunóidh Aonad Teicneolaíochta Faisnéise na hOifige, in éineacht leis an Oifigeach Gaeilge, bunachar sonraí lárnach d'acmhainní Gaeilge na hOifige. De réir ama, déanfar fardal acmhainní a chur le chéile sa bhunachar sonraí seo ar nós abhcóidí a bhfuil an Ghaeilge ar a dtoil acu, gluais téarmaí dlí, treoir bhunúsach comhrá lena n-áirítear treoir d'fháilteoirí, mionsonraí de chlóschríbhneoirí a bhfuil an Ghaeilge ar a dtoil acu, nasc le bunachar sonraí acmhainní Gaeilge na leabharlainne, téacs na scéime seo agus cibé ábhar oiriúnach eile a chinnfidh an tOifigeach Gaeilge in éineacht leis an bhfo-ghrúpa Comhpháirtíochta Gaeilge ó am go ham.

Cuirfidh An Leabharlann eolaire ar fáil maidir leis an ábhar acmhainne atá le fáil trí Ghaeilge agus déanfar sin a lánpháirtiú lena Bhunachair Sonraí Teicneolaíochta Faisnéise.

Lorgóidh Aonad Acmhainní Daonna na hOifige saorálaithe chun seirbhísí Gaeilge a sholáthar in aonaid den Oifig ina bhféadfadh gá a bheith ann seirbhísí a sholáthar trí mheán na Gaeilge. Aithneofar an fhoireann sin trína liostú ar an mbunachar sonraí Teicneolaíochta Faisnéise Gaeilge.

Déanfaidh Aonad Acmhainní Daonna na hOifige athbhreithniú leanúnach ar an líon foirne atá líofa sa Ghaeilge agus déanfaidh sé iarracht foireann a earcú a mbeidh sé d'inniúlacht acu oibriú trí Ghaeilge agus trí Bhéarla.

Scaipfear comhaltaí den fhoireann atá líofa sa Ghaeilge i measc Aonaid agus Rannáin éagsúla na hOifige chun na gealltanais atá leagtha amach sa scéim seo a thacú.

5. MONATÓIREACHT

Déanfaidh an tOifigeach Gaeilge, in éineacht leis an gCeannasaí Riaracháin, athbhreithniú ar oibriú éifeachtach na scéime agus tuarascáil mar atá thuasluaite a chur faoi bhráid na bainistíochta gach sé mhí (An Tuarascáil Gaeilge).

6. AN SCÉIM CHOMHAONTAITE A PHOIBLIÚ

Déanfar ábhar na scéime agus gealltanais agus forálacha na scéime seo a phoibliú i measc an phobail trí:

- Phreas-eisiúint
- An scéim a sheoladh go hoifigiúil
- Na forálacha a fhógairt
- An scéim a scaipeadh i measc gníomhaireachtaí agus comhlachtaí poiblí
- An láithreán gréasáin

Tá cóip den scéim seo curtha ar aghaidh freisin chuig Oifig an Choimisinéara Teanga.